

## ■ PARTIDA CRISTIANDEMOCRATICA

# Quest na munta ina schanza manchentada

La pcd cumbatta vinavant per las famiglias

**(cp) La Partida cristiandemocratica (pcd) dal Grischun deplorascha fitg il resultat da la votaziun davart sia iniziativa per las famiglias. Il far tema tras ils adversaris ha evidentamain dominà. Positivamain valitescha la pcd ch'igl è reussi da pledentar era votants ordai-fer la partida per sia iniziativa. Fitg cuntenta è la pcd grischuna davart il cler fiasco per l'iniziativa dals verd-liberals.** «Las famiglias han merità da vegnir stgargiadas finanziailmain – e quai pir che mai», manegia cuss. naz. *Martin Candinas*. La pcd grischuna deplorascha perquai il na a l'iniziativa en favur da la famiglia che l'avess stgargià cleramain.

Cun ina cumpart da 21,82% en il Grischun ha la pcd chantunala gi il sustegn per las famiglias lunsch sur l'agen electorat ora. La pcd grischuna deplorascha dentant che sia iniziativa per las famiglias ha strusch chattà sustegn tar las autras partidas che l'han refusà or da motifs electorals. Persula – cunter la vasta frunt da cussegl federal, parlament e partidas politicas da dretg fin sanester – ha la pcd cumbattì persvadentamain per las famiglias. «Nus essan persvadids ch'in levgiament finanziail dal stan mesaun e da las famiglias era pli che giustifitgà», tenor cuss. dals stans *Stefan Engler*.

Ils adversaris han dentant gi dapli success cun lur tementar ch'il stan mesaun pitessia da las taglias mancantas e tras la dischinfurmaziun che be famiglias ritgas profitassian da la iniziativa da la pcd. La

pcd dal Grischun deplorascha quel fatg, siond ch'ella era adina persvadida che las famiglias avessan merità in levgiament finanziail. La pcd vegn perquai a regurdar ils adversaris da l'iniziativa da las famiglias, che han avertì da perditas da taglia, a lur peds, sch'els vegnan a pretender sbassadas da taglia per lur clientella.

Sco partida burgaisa, sa cumprovada, constructiva e che vul schliaziuns vegn la pcd a cumbatter vinavant per il stan mesaun e la famiglia. Ella pretenda perquai bunas cundiziuns generalas a favur da famiglias, uschia: rabats sin taglias enstagl ina deducziun generala per uffants (moziun da *Martin Candinas*), congedi da paternitad (iniziativa parlamentara da *Martin Candinas*) e la liberaziun da las premias dals uffants (iniziativa parlamentara da *Ruth Humbel*). La pcd vegn pia a cumbatter vinavant per la famiglia.

Fitg cuntenta è la pcd grischuna dal cler debachel che l'iniziativa dals verd-liberals ha fatg. Ils votants na vulan savair nagut d'in experiment cun consequenzas malsegiras. Era legra la pcd grischuna il gea a la construcziun da la mensa e la mediateca a la Scola chantunala grischuna. Uschia survegnan scolaras e scolars da la «Kanti» ina infrastruttura moderna.

Suenter che la pcd svizra ha gi lantschà dapli lung temp in atgna iniziativa, e survegni sustegn sur la partida ora, è la pcd persvadida ch'i la vegn a reussir dad augmentar quest atun ses electorat er en il Grischun.